

## KONTROL MOZIOA

### Emakumeen Etxearentzako kokapen berri baten beharrari buruz

Aitzole Araneta Zinkunegi, Elkarrekin Donostia udal-taldeko bozeramailea, eta Reyes Carrere Zabala, EH Bildu udal-taldeko bozeramailea, Udalbatzaren Araudi Organikoaren 98. artikulua oinarri, KONTROL MOZIO hau aurkezten du, **Emakumeen Etxeak beste kokapen behar duela eta, OSOKO BILKURAN EZTABAIDATZEKO**. Mozio hau Pertsonentzako Zerbitzuen Batzordeak 2021eko azaroaren 15ean izandako bilkuran egindako interpelazioaren ondorio da.

### JUSTIFIKAZIOA

2010eko azaroaren 10ean ireki zituen ateak Donostiako Emakumeen Etxeak. Donostian, udal-zerbitzu hori irekitzea mugarri bat izan zen berdintasunaren aldeko borrokan eta gure hirian dauden emakumeen kontrako diskriminazioaren eta indarkeriaren aurkako borrokan.

Hautatutako kokalekua Udaleko Zerga Biltegiaren bulego izandakoak izan ziren, Okendo kaleko 9. zenbakian. Erdialdeko eraikin horrek 300 metro koadro ditu, eta lau solairu –sotoa, beheko solairua, lehen solairua eta bigarren solairua–. Gainera, bere bulegoetz gain, hor daude Berdintasun atalarenak ere.

Proiektuaren hasieratik, talde feministak eta emakume-elkarteak izan dira haren benetako eragileak. Kogestio-organoa Udalak eta Koordinakunde Feministak osatzen dute –Aldundiaren ekarpen ekonomikoarekin–, eta, erakundearen eta talde feministen elkarlanari esker, Emakumeen Etxea erreferente bat da hiriko emakumeentzat (gaur egun 1.600 bazkide baino gehiago ditu). Azken hamaika urteotan, kogestio-eredu horrek milaka emakumeri eman die zerbitzua –urtean 35.000 baino gehiagori–. Emakumeok gune seguru horretara jo dute, laguntza espezializatu bila, eta ahizpatasun-sareak sortu dira hala, betiere kontzientzia feminista oinarri.

Emakumeen Etxean parte hartzen duten kolektiboak eta bazkideak aspaldi ari dira erreklamatzeko Emakumeen Etxearentzako beste leku bat aurkitzeko. Ezin dugu ahaztu Emakumeen Etxea mugarri bat dela eta hainbat motatako zerbitzuak (aholkularitza juridikoa, laguntza psikiko eta sexologikoa, eta abar) ematen dizkiela era guztietako ezaugarriak dituzten eta zeinahi egoeratan dauden emakumeei. Baita, eta bereziki, indarkeria jasan dutenei ere. Era berean, esanguratsua da *Aurrekontuak genero-ikuspegitik aztertzeke udal txostenean* eta Emakumeen Etxearen urteko memorian eraikin berri bat egiteko premia sartu izana.

Gaur egungo eraikinak 300 metro koadro inguru ditu, eta, Etxearen jardueretarako, sotoa eta bi solairu erabiltzen dira. Gainera, eraikinean –lehen esan bezala–, bada beste solairu bat ere: hortxe kokatua dago Berdintasun Bulegoa. Azken batean, bulego horietarako eta harrerarako eta zerbitzuetarako behar diren metroak kenduta, programatutako jarduerak egiteko balia daitekeen espazioa azalera osoaren % 50 baino zertxobait gehiago da.

Metro-eskasia ez ezik, etxeak baditu beste hainbat arazo larri ere, hala nola: aireztapena (hain justu, arrazoi horrexegatik, sotoa erabili gabe egon da pandemian zehar), hezetasuna eta biltegitratzea. Gainera, hirugarren solairua eta sotoa ez dira irisgarriak mugikortasun murriztua duten pertsonentzat, igogailua ez baita solairu horietara iristen. Eraikinaren gainbehera gero eta nabarmenagoa da.

Hala ere, azken urteotan, Udal Gobernuak ez du inolako urrats irmo eta seriorik egin aukera duin eta bideragarriak bilatzeko, udal-zerbitzu hori hobetzeko asmoz.

Batzordean Berdintasuneko zinegotzi ordezkariari horri buruzko interpelazioa egin genion, eta hark erantzun zuen 1.000 metro koadrotik gorako espazio bat eskaini zitzaiela Infernua eremuan. Zinegotzi ordezkariaren hitzetan, haiek adierazi zuten Infernua oso urrun dagoela eta konexio hobeak behar direla.

Hala eta guztiz ere, zinegotziak ez zuen inolako enpatiarik agertu Emakumeen Etxearen koordinakundeak egiten dituen aldarrikapenekin eta haren premietara egokitutako kokapen berri baten premia aski frogatuarekin, eta ez zuen irtenbide urgenterik eman.

Horiek horrela, behean sinatzen dugun zinegotziok KONTROL MOZIO hau aurkezten dugu:

- Donostiako Udalbatzak hertsatuki eskatzen dio Udal Gobernuari 2022ko aurrekontu-proiektuan partida bat aurreikus dezala, 2022an bertan urrats esanguratsuak egin ahal izan daitezen Emakumeen Etxearen kogestio-taldearen eskaera historikoari erantzuteko.

Donostia, 2021eko azaroaren 19a

Aitzole Araneta  
Elkarrekin Podemos udal taldea

Reyes Carrere Zabala  
EH Bildu udal taldea